

DISSERTATIO INAUGURALIS MEDICA  
DE  
**ANGINA  
INFLAMMATORIA  
CUM FEBRE ACUTA,**

Quam  
VOLENTE DEO  
JUSSU ET AUTHORITY  
*GRATIOSISSIMI MEDICORUM ORDINIS,*  
IN ILLUSTRACIA ACADEMIA BASILEENSI,

Pro  
SUMMIS IN MEDICINA HONORIBUS  
ATQUE PRIVILEGIIS DOCTORALIBUS  
RITE IMPETRANDIS,

Publico Eruditorum Examini submittit

**MATTHIAS LANDOLT,**  
TIGURINUS.

*Ad d. 29. Septembris M DCC XLVII.*

H. L. Q. S.



*B A S I L E Æ,*

---

Typis JOH. JACOBI THURNISII, EMAN. Fil.

V I R O

EXPERIENTISSIMO, EXCELLENTISSIMO,

*atque*

DOCTISSIMO,

D O M I N O

JOH. CASP. LANDOLTO

Medicinæ Doctori, atque Illustr. Reip. Tigurinæ

ARCHIATRO

MERITISSIMO,

FRATRI SUO CHARISSIMO,

Quod amore plus quàm Fraternali, consiliis, manu ductioneque  
in Studiis suis formandis, Parentis loco se juvare atque  
amplecti semper voluerit,

*Hasce Studiorum suorum primitias tanquàm gratissimi animi  
erga tot in se merita, tesseram, sacras esse cupit*

AUTHOR.





## §. I.



Ræfens de Angina Inflammatoria  
Thema inaugurale non ideo felegi,  
quoniam non & alii ante me pro  
simili scopo id pertractandum sibi  
sumpserint, sed tam quia tenuēs  
meæ vires, novam materiam cum  
publico communicare haud mihi  
concefferint, quam quoque ob ali-  
qua notata non facile apud alios  
obvia, quæ huic materiæ adspargere licebat.

## §. II.

Anginæ vox à Græco adverbio ἄγχι, quod propinqui-  
tatem & spatii imminutionem denotat, procul dubio ori-  
ginem traxit, idque docent voces ἀγχίαλον, ἀγκέμαχος, ἀγκι-  
σῆναι, quæ vox de ovibus accipitur, præ metu in densum  
agmen conglomeratis; hinc ἀγκώνη, laqueus, anquina funis  
quo antenna malo alligatur. Ex his strictiori sensu ad gut-  
turis



turis compressionem & angustationem significandam transit, unde *ἄγχω*, strangulo, suffoco. Hinc apud Plautum in *Mostellar.* Act. I. Scena III. In Anginam ego nunc me velim vorti, ut veneficæ illi fauces prehendam & enicem sceleratam stimulatricem. Fuit & Angeronia Dea apud Romanos, cui sacra solennia ideò dicuntur instituta, quoniam Anginâ aliquando sævâ grassante, ei supplicantes ab hoc morbo liberati credebantur, huic in sacello Deæ Voluptatis appellatæ, seu Voluptatis aliàs sacra fiebant, quòdque digito, labris appresso, repræsentabatur, silentii Dea habebatur, sed cum Harpocratis numine, uti mihi contra vulgarem opinionem videtur, haud confundenda; cum aliud sit arcana religionis & scientiarum silentio tegere, aliud clandestinas voluptates astutè occultare atque reticere. Causa verò cur Anginâ detenti ad ejus numen confugerint, fortè fuit, quia & ipsi ob angustatas fauces ad silentium redigebantur.

### §. III.

Angina in genere sumpta morbus est, qui & deglutitionem & aëris in asperam arteriam transitum plus vel minus impedit cum dolore & suffocationis metu; prouti vel magis Gulæ initio seu Pharyngi, ejusque vicinis partibus, vel Laryngi inhærescit. Hæc verò impedimenta deglutitionis & respirationis, jam ante Galeni tempora in quatuor species distinxerunt, ut alia esset *κυνάγχη* voce desumpta à canum anhelitu linguam hiantem rictu exerentium, in qua musculi Laryngis proprii inflammarentur; alia *παρεκκυνάγχη*, quæ mitior esset musculis Laryngi *συναπλομένοις* (hodie communibus) laborantibus; alia *συνάγχη* cum Pharyngis musculi, alia

παρεσυνέχην, cum externi Pharyngi muscoli, (sed quid sunt?) afficerentur. Sed recte Galenus animadvertit, hisce quatuor indicatis inflammationis sedibus, rem ipsam haud absolvi, siquidem plures gradus intermedii inter has dentur, & Laryngis vitia vel Pharyngis, mutuò sibi compatiuntur.

§. IV.

Aggredior jam historiam Anginæ Inflammatoriæ cum Febre Acuta junctæ exponere, quum alias Anginæ species, Spuriam scilicet convulsivam &c. pertractare, harum pagellarum angustia haud permittat.

Ingruit uti reliquæ Inflammatoriæ Febres cum rigore & horrore per semihoram utplurimum, vel diutius durante: hunc excipit calor febrilis cum consuetis symptomatibus, fitis, doloris capitis &c. collum difficilius moveri & circumagi incipit, & vel cum ipso Febris initio coincidunt molestiæ in faucibus, aut post complures aliquando horas, demum illæ vexare ægrum incipiunt, uti quotidianæ observationes hoc testantur, hinc adeò notandum, antequam ad reliquam morbi descriptionem pergam, malè vulgo Febrem, quæ in inflammationibus partium internarum sine violentia externa ortis, adest, secundariam vel symptomaticam appellari, quasi positâ priùs inflammatione, & ejus symptomatibus, ardore scilicet, dolore, pulsatione, demum ipsa Febris ex his originem trahat. Veritatem hujus asserti, quod ex dolore inflammatorio non demum Febris nascatur, primus vidit Felix Platerus Prax. Med. Tom. II. p. 39. *Neque enim, inquit, uti hætenus persuasum, ejusmodi inflammationes Febres istas precedere, nec procreare, uti multis ostendere possemus, sic hoc satis declarat, quod*



*hæ Febres, antequam punctorius dolor aut inflammationis indicia se demonstrent, cum horrore & subsequente calore invadant, & quandoque horis aliquot illa præveniant, nec proin ab illis inflammationibus aliter quàm quod à Febris prius excitatæ, novo calore in viscere cordi vicino (si est e. gr. Peripneumonia) augeantur, accendantur. Quod tamen Febrim non tum primum incepisse satis demonstrat, multoque minus putridam eam esse (sicuti quoque existimarunt) cum & ab inflammatione calor ille suscitatus, copia sua potius, quam putredine Febrem augeat. Mirandum vero est hujus præcepti ex experientia nati immemores recentiores Practicos, adeo illi distinctioni causarum Februm à Galeno traditæ inhæsisse. Sic enim e. gr. locus Galeni in commentariis Celeb. Van Swieten ad Boerhaavii Aphorism. 770. laudatur: „ Optime notavit Galenus, cum „ dicit: Aliarum Februm quædam ex inflammatione, quædam ex humoribus accenduntur. Et quæ ex inflammatione velut inflammatarum partium quædam symptomata sunt &c. “ Similiter Frid. Hoffmannus in Medicina Ration. Syst. Tom. IV. p. 323. „ Ubi sanguis vel alius humor præter naturæ consuetudinem alicubi congestus, nervosæque membranas tendit impensius cum dolore ac premit, inflammatoriæ acutæ suboriuntur. “ Febris vero causam in corpore prius tanquam antecedentem internam latentem, præexistere debere antequam causis occasionalibus excitata, in Anginam exquisitam cum Febre acuta erumpere possit, docent ea quæ inflammationem in faucibus equidem efficere valent, sed sine comite exquisita Febre acuta, uti sunt spinæ piscium faucibus infixæ, vapor calcis è muris recenter incrustatis, aliaque quæ postea in enumeratione antecedentium causarum recensentur. Præterea*

terea observandum est Febres acutas supra dictas, ad Synochas sine ulla limitatione vulgo referri, cum tamen Synochas sine horrore notabili incipere, uno ore omnes post veterum descriptionem, affirmant, notumque sit, quod cum rigore & horrore notabili initia capiant, Angina, Pleuritis &c. exquisitæ deinde Synochæ non habent remissionum tempora, sed sæpe Angina comitem habet Febrem, quæ singulis vel alternis diebus exacerbatur, suasque habet remissiones; quod probatur Tritæo anginoso Ettmüller, ut & Amphimerina anginosa Epidemica ac pestilente Foresti. Obs. lib. VI. quæ est la Coqueluche Riverii.

§. V.

Procedente morbo, vel tumor & rubor ad radicem linguæ, uvulam, tonsillas & vicinas partes, vel exterius sub mento, anterieus vel ad latera colli, ad pectus usque aliquando apparet, vel nulla tumoris manifesta indicia adfunt; Deglutitio variis gradibus impedita, dolorifica, impossibilis, ita ut potus per nares regurgitet, difficilisque solida quam liquida per fauces transcendat. Vultus rubet, tumet, oculi turgent, lingua rubra, livida, nigrescens, inflexa, retorta, aliquando extra dentes & labia prominat, respiratio exigua, cum situ erecto, & summo suffocationis metu, vel aliquando satis libera, desiderium aëris frigidi, vox suppressa, arteriarum temporalium pulsatio, venarum colli tumor, quandoque Cephalalgia, sensuum torpor, sopor, inquietudo summa, extremorum refrigeratio, decubitus in dorsum, crassum quid ægre expuunt, vel ex aridis faucibus paucum vel nihil extundere possunt ægri. Duratio morbi varia, observatum enim est intra paucas horas ægrum periisse, vel intra unum diem, tres, septem &c. celeris-



celerisque hæc catastrophe morbi maxime cum nullus tumor vel extus vel intus apparet, fieri solet, in ipsa nempe *κυνγχῆ*, quanquam Hippocrates libr. III. de Morbis, hanc speciem ad nonum usque diem tolerari posse asserat. Aliæ species ad decimum quartum & vigesimum usque diem protrahuntur. Liberumque est eas quæ Laryngem magis occupant Cynanches vel Paracynanches, quæ vero reliquas faucium partes & deglutitionem magis impediunt Synanches vel Parafynanches vocibus insignire (ubi notum est voculam *παρὰ* mitiorem semper gradum denotare) modò observetur, non semper his vocibus easdem sedes affectas, à variis Medicis designari. Hæc morbi symptomata ex variis authoribus collata, in quadam constitutione Epidemica Vratislaviensi anni 1699. tam clare observabantur, ut operæ pretium me facturum videar, si ea ex Ephemer. Nat. curios. Dec. III. a. IX. & X. append. p. 9. proponam: *Mense Julio aliquot Anginæ exempla allata fuere, i. e. Laryngis seu Pharyngis inflammationis, in juvenibus potissimum sanguineæ constitutionis, post motus corporis impetuosiores, aut nimias potuum spirituosorum ingurgitationes, horrorem ingens æstus cum siti Tantalea excipiebat, pulsus erat frequens, durus, inequalis, urina saturatissime rubra, magna aderat respirationis difficultas, apertoque ore anxium ægri spiritum ducebant: Et crescente malo strangulationis periculum instabat, deglutitio tantopere impedita, ut potus faucium angustias vix superaret, quin sæpe in nares re-funderetur, in faucium isthmo interdum apparebat tumor, interdum autem in externo collo, ubi morbus mitior est, vel oculis cernebatur, vel manibus palpabatur, in iis vero quorum vita in majori periculo, nullus plane tumor deprehendebatur. Non tantum isthmus ita exurebatur, sed spectabatur simul in ore rubor flam-*  
*meus,*



*meus, urgebat dolor acutus pulsatorius & punctorius, lingua tumida obscure rubra, canum instar exerebatur, fauces arebant; si egrotantium os aperias, omnia tensa videbantur, venæ infarctæ, oculi prominentes & sanguine suffusi; præterea aderat jacendi difficultas, ac frequens sedendi cupiditas. Ingens præ foribus periculum, cum articuli gelido torpore rigeant, vultus livescebat, vox intercipiebatur, & stridor quasi in gutture & pectore audiebatur, inexorabilis mors instat, deficiente pulsu, & voce quasi in caninam mutata, apparente etiam subinde spuma oris.*

#### §. VI.

Utiliter porro Angina distinguitur in Protopathicam & Deuteropathicam seu vulgo Symptomaticam, quarum prior primarium morbum denotat, qui non alii definito morbo, demum superaccedit, cum posterior, ejusmodi alii morbo superveniat, quanquam hîc probe animadvertendum sit, non omnia vitia faucium, quæ per decursum morborum acutorum incidere consueverunt, quæque sub nomine symptomatum Anginoideorum veniunt, veras esse symptomaticas Anginas, cum plerumque in aliqua crusta Aphthosa, aut alia ex pituitæ oris & faucium, & corruptæ quoque salivæ, ventriculique & asperæ arteriæ fervidis & addensatis halitibus fere oriri soleant, sub ista vero crusta circuitus sanguinis suffocatur quasi & superficialiæ oriuntur inflammationes, quæ deglutitioni majora vel minora impedimenta afferunt.

#### §. VII.

Antequam vero de causis Anginæ dicam, de quibusdam ejus speciebus ab nonnullis authoribus propositis, quæ aut incertæ sunt quoad descriptionem, aut dubiæ in quam-

nam classẽm verarum vel spuriarum collocandæ sint , dicendum erit. Primò enim Boerhaavius in Aphorismis suis de cogn. & cur. morbis §. 801. ipsius asperæ arteriæ inflammationem proponit, quæ nullo externo tumore sui indicia præbeat, sed præter acutam Febrem, vocem exhibeat, acutam, clangosam, respirationem parvam, frequentem, erectam cum summo molimine, angustias summas, & citam mortem inferentem, distinctamque vult ab ipsius Laryngis inflammatione, quoniam in hac sit vox stridula & acutissima & dolor ex elevatione Laryngis inter deglutendum, cum in inflammatione asperæ arteriæ vox sit clangosa &c. conaturque, uti ex Commentario Boerhaaviano à Cl. van Swieten edito patet, id ex locis quibusdam Hippocraticis probare, cum illi loci tamen aut de asperæ arteriæ fluxu falso eam exulcerante, aut de ipsa Cynanche intelligi possint. Deinde Galeni explicationem ubique adeo laudat, quasi inflammationis asperæ arteriæ prava symptomata, ita se haberent, uti Boerhaavius ea existere contendit, dum hic funestissimam hanc esse Anginæ speciem dicit, quatenus discrimen sit, ne *aucto tumore inflammatorio subito suffocetur æger*. At vero clarissimus extat locus Galeni in commentar. ad Aphorismum 36. Sect. IV. qui à metu strangulationis absolvit: ἡ γὰρ μὲν τῆς τραχείας ἀρτηρίας φλεγμονή, δύσπνοίαν μὲν τίνα δύναται ποιῆσαι πνίξι δ' οὐ δύναται. διὰ τε τὸ μέγεθος τῆς κατ' αὐτὴν ἐνρυχωρίας, καὶ τὴν λεπρότητα τῶν χιτῶν. ἀδύνατον γὰρ οὕτω λεπτῷ σώματι φλεγμονὴν ἐνρυχωρίαν ἀξιόλογον, πληρῶσθαι. &c. i. e. Inflammatio asperæ arteriæ aliquam quidem respirandi difficultatem asferre potest, suffocationem vero haud potest, tam ob spatiosam ejus cavitatem, quam ob tunicarum tenuitatem; impossibile enim est tam gracile corpus inflammatione affectum: notabilem cavitatem implere posse.

Secundò,



Secundò, præter Anginæ species memoratas, mentio fit alicujus, quæ εἶσα ὥς τῆ σπονδύλης vocatur, quem affectum vertebrarum colli luxationem ad interiora factam, interpretantur, cum vel sine inflammatione junctam. Hanc à causis internis generari variis in locis prædicat Hippocrates. Sic Aphorism. 26. Sect. tert. inquit: Pueris, cum ætate processerunt, tonsillæ, nec non vertebræ quæ est ad occiput, intrò pulsiones &c. & Aphorism. 36. Sect. IV. Si cui valde febricitanti collum repente pervertitur, ut vix deglutire possit, neque ullus appareat tumor, funestum. Epidemic. porrò libr. II. Erant autem eorum, qui ex Angina laborabant, hujusmodi: „ Vertebræ cervicis modò „ plurimum, modò prope erant ut introvergerent, cer- „ vixque interna versùs, cavitatem præ se ferebat, ibique „ ad attactum dolebat . . . . partes quæ sub malis tuebant, „ non erant inflammatis similes . . . . linguam non facile „ movebant, quæ major & eminentior esse apparebat . . . . „ nec devorare aliquid poterant nisi moleste . . . . quibus- „ dam tempora incalescebant, etsi non febricitarent; qui- „ bus neutram in partem declinabat illa protuberantia, „ (ἐξόγκωσις) iis nihil paralytici accidebat, omnesque quos „ videre licuit, fuerunt superstites . . . . quibus vero in al- „ terutram partem deflectebatur cervix, ii ex ea parte ner- „ vorum resolutione afficiebantur . . . . istæ vero nervorum „ resolutiones non totum corpus perreptabant, sed ad ma- „ nus usque pertingebant . . . . quibus vero Febris aderat, „ illis gravior fuit respirandi difficultas . . . . hi se erigere „ non poterant, sed omnes quos novi mortui sunt.

#### §. VIII.

Modum vero quo hæc paradoxa dimotio vertebrarum fieri

feri posset, probabilem reddere conatur Galenus, qui vel ex diuturno affluxu humoris serosi tendines musculorum colli expandentis, vel ob spasmum eorum ab impetu inflammatorio, hanc introversionem vertebrarum colli fieri posse concipit, morbumque quidem rarissimum esse asserit, nullibi tamen ubi de hac Anginæ specie commentatur, neque in libr. IV. de locis affectis, neque in mox laudatis Hippocratis locis, in quos commentatus est nempe, se vel semel hunc morbum deprehendisse dicit; cum tamen in Comment. Boerhaaviano Galenus ita loquens producat. Nunc Anginæ speciem exponit (sc. Hippocrates) quæ raro à nobis visa est, atque citatur locus ex Commentario 2. libr. II. Epidemicorum, qui est merum non ens, cum Galenus modo in librum I. III. & VI. Epidemicorum commentarios scripserit. In eodem Comment. Boerhaav. T. II. p. 704. observatio affertur de infante X. mensium, cui caput retro inclinatum erat, guttur prominulum & manifesta in cervice cavitas apparebat, qui nihil deglutire poterat, cuique post validas convulsiones hoc malum secutum fuerat. Sed an hæc historia morbi ad Hippocraticas confirmandas pertineat, non video, siquidem expressis verbis Hippocrates, hunc morbum in provectioris ætatis pueros sc. pubescentibus proximos, incidere narret; imò ipse Galenus tendines puerulorum nimis debiles esse & molles dicit, quàm ut huic morbo producendo idonei sint, neque de convulsionibus antegredientibus morbum sermo fit apud Hippocratem. Ut dicam quod ego sentio, morbum hunc accidisse non penitus negari potest, sed non fuit λόρδωσις, seu luxatio ad interiora, quomodo enim colli luxatio epidemica esse posset? ut jam de gravissimis symptomatibus  
imò



imò cita subsequente morte, quæ modo sublaxationem gravio-  
riorem sequitur, non dicam; sed ut videtur spasmus muscu-  
lorum cervicis, quo quædam vertebræ ad posteriora valida  
adductione ad se inclinatæ antè versus Laryngem, illam  
*ἐξόγκωσιν* produxerunt, cumque tractio ab utroque latere  
æqualis esset, nulla notabilis debilitatio & pressio nervis ex  
medulla spinali egredientibus inferri potuit, sed cum in uno  
latere id fiebat, aliqua major compressio, leviores illas pa-  
ralyses attulisse credibile est. Quidquid sit, ut morbus iste  
inter cognitos & fieri solitos recipiatur, observationes in-  
dubias & claras, quibus determinetur, ulterius requirit.  
Tertiò, Subdola quædam datur Anginæ species, quæ sæpe  
in miliari Febre in primis insultibus morbi ægros adortur,  
uti aliæ Anginæ, quæque aliquando fatis gravis est, eam ve-  
ro ad veram Anginam inflammatoriam haud pertinere fatis  
patet, quoniam stadium suum non decurrit, sed cito dispel-  
litur, vel & cito redit, & rursus recedit; deinde quia in  
primo stadio Febris miliaris, quæ catharrhalis est, se osten-  
dit, uti docet Cl. Wagnerus *Act. Nat. Curios. Volum. 7. p. 203.*  
cumque inflammatorium stadium ea ingreditur, fere sem-  
per abest.

#### §. IX.

Ad hunc morbum disponunt atque in disposito corpo-  
re eum excitare solent, temperamenta sanguinea, ruffique  
notante Sydenhamo, quique Plethorâ aggravantur, maxi-  
me ex suppressione Hæmorrhoidum, aliarumque consueta-  
rum sanguinearum evacuationum, aër vernalis ut & au-  
tumnalis præcedente constitutione austrina, isque frigidus  
æstuante corpore admissus, peculiarisque ejus corruptio sub  
epidemica constitutione nullis experimentis uti in aliis sta-

tibus epidemicis, fatis detecta, abusus vini generosi, interque cibos fungi culpantur, de quibus notum est, quod faucibus infestiores esse soleant, oratio longa in frigido loco habita, iter per loca æstuosa & sicca, equitatio vento adverso, ut & vociferatio, lotio frigida capitis intempestiva, uti & ejus nudatio, aliàs integumentis calidis tegi, assueti, contentio nimia sub partu, Dysenteria adstringentibus intempestive suppressa, acria quæcunque faucibus admota, vapores muri recenter incrustati, spinæ piscium &c. in quantum quidem ista corpus offendunt, in quo causa ad Febrem suscitandam antecedens, latet, aliàs harum antecedentium causarum plurimæ, inflammatorium aliquod malum sine Febre acuta concitare queunt.

§. X.

Causa proxima Anginæ inflammatoriæ veræ cum Febre acuta, vulgo in sanguine Phlogistica densitate laborante quæritur, qui in vasis arteriosis partium affectarum impactus hæreat. At vero hujus causæ idea nimis generalis est, quoties enim sanguinem crusta inflammatoria densum sine ulla Febre acuta præsentem, ope V. S. educimus? cur vasa capillaria à tenaci hujusmodi sanguine obstructa, ad quæ rursus dilatanda, & sanguinem meabilem iterum reddendum, cor auctis viribus insurgere dicitur, & sic Febrem procreare, non in omni casu unam eandemque Febrem movet? Est itaque in hujusmodi morbis Inflammatoriis cum Febre acuta junctis, omnino ad Febrem ipsam attendendum ratione causæ, quæ in corpore præsens & quasi ad maturitatem suam perducta, vasorum systema ad reactionem illam, quæ Febrim facit, instigare apta est. Ea vero reactio secundum leges animales procedit, neque ex doctrina  
Mecha-



Mechanica de vecte & viribus vivis explicari potest. Uti enim in hac supponitur vis premens & movens in genere, qualis vero sit ignoratur; sic in corpore humano vivo effectus pressorum & motus localis mechanicè fiunt, sc. major vis producit majorem effectum, major impulsus majorem celeritatem; sed id quod premit atque movet, peculiare suas leges juxta quas animalia creata sunt, sequitur, quæ æque speciales sunt ac vires magneticæ vel electricæ. Causam igitur proximam inflammationis jam factæ, statim sanguinis esse in vasis arteriosis capillaribus sanguineis vel serosis, admittimus quidem, quæ sedem sibi in musculis Pharyngis, Laryngis, uvulæ, linguæ &c. figit; ita tamen, ut ante omnia Febrilis ille motus, qui materiam inflammatoriam ad dictas sedes deponit, sit pro causa accipiendus. Id quod præter ea quæ supra dicta sunt, ex eo probatur, dum, uti quidam Practici observarunt, aliquando fit, ut postquam Febris inflammationem præcedens, sæva satis fuisset, sequente dolore inflammatorio notabiliter se remiserit, tanquam irritante causa extra sanguinis consortium expulsa, uti id in Exanthematicis Febribus observari vulgo solet.

## §. XI.

Rationes symptomatum tam ex consideratione impeditæ functionis partium affectarum & vicinarum, quàm ex impetu Febrili facile deducuntur, neque enim siccitatis, sitis, doloris, impeditæ deglutitionis, metusque suffocationis, uti puto, causæ obscuræ sunt, uti quoque oculorum & vultus intumescencia & rubor, torporque sensuum ex sanguinis impeditiori regressu per jugulares venas, atque denegato sufficienti ingressu aëris in pulmones, facile intelliguntur; adeo ut hisce diutius immorari haud opus sit.

## XII.

§. XII.

Prognosin quod attinet, Angina omnis exquisita cum Febre acuta, morbum per se fatis ancipitem constituit, quanquam enim partes affectæ, ad vitam continuandam haud proxime faciant, laborant tamen viæ, sine quibus apertis nec aëre nec cibo & potu debite refici potest æger. Anginæ ergo illæ gravissimæ sunt, & celeriter interimunt, quæ nihil conspicuum faciunt in faucibus neque collo, plurimum vero dolorem inferunt atque Orthopnoeam, hæ enim eodem die quo incipiunt vel secundo, tertio aut quarto strangulant. Prognost. 3. Hæc etenim veræ Cynanches symptomata sunt, in qua inprimis musculi Thyreo-Arytenoidei laborant, qui proxime regioni Glottidis & ventriculis Laryngis exterius accumbunt, qui cum inflammatione tument, omnis tumoris extensio in angustum illum tractum agere debet, siquidem hi musculi intra Thyreoidis cartilaginis alas latent, quæ tumori nullum spatium concedere possunt. Quod si musculus albus Glottidis, uti post Dodartum, Glottidis marginatum ambitum vocat Boerhaavius, inflammatione afficeretur, seu chordulæ Ferreni potius (vid. Act. Acad. Reg. Paris. ann. 1742.) esset ibi maxima angustiarum causa. Ary-Arytenoidei obliqui & recti inflammati quoque insignem parient angustiam, sed eorum tumor retrorsum versus tunicam cellularem, quæ posteriori faciei Laryngis & anteriori Pharyngis est interposita, cedere potest. In Cynanche si dolor non manifestus redditur, funestam habet significationem; vel ut Foesius reddit, quæcunque conspicuum dolorem non produnt, periculi plena sunt. Coac. qui locus paulo esse videtur obscurior, sed egregie illustratur ex Aretæo edit. Lugd. Bat.



p. 5. his verbis: *πόννοι καρτεροί, ἀλλά καὶ ὑπὸ τῆς πνίγῃ συνδιωκόμενοι ἀμαυρῶνται.* h. e. Dolores acerbi (sc. sunt) sed strangulatione vexati, eos obscurius sentiunt; hujusque Phœnomeni causa clare intelligitur, ex sensuum torpore quem impeditior sanguinis recursus tam à cerebro quàm per pulmones, ob venarum jugularium compressionem & viarum ad pulmones angustiam, affert. Unde quæ causa doloris acerbi in faucibus hæret, ea effectum suum haud exerit, ob nervorum compressionem à sanguine restagnante, quæ sensus hebetat. Si in Angina cum Febre dolores capitis præter rationem oriuntur, periculosum id est, Coac. docet enim, inflammationem ad caput imminere, quæ ibi deliria & convulsiones producet. Si autem inflammatio faucium ob morbi magnitudinem ad meliorem frugem redire haud potuit, longe minus in cerebri membranis id fiet, unde augmentum gravium symptomatum & periculum magnum. Idem cæteris paribus verum est, de Metastasi materiæ inflammatoriæ ad Thoracem, secundum effatum Hippocraticum. Quibus ex Angina in pulmonem mali fit conversio, intra septimum diem moriuntur, si vero hos effugiant *ἔμπτυοι*, h. e. purulenti evadunt. Sect. V. Aphor. 10. Præter rationem vero (*ἀσήμεως*) aliquid in morbis contingere dicitur, cum symptomata per morborum decursum obvenientia, non fiunt ob motus criticos, qui antegressam morbi coctionem & emeliorationem supponunt, & quanquam molesti sint, tamen in bonum finem excitantur, si vero nulla concoctio præcesserit, hujusmodi symptomata, ex. gr. mox dictus dolor capitis, præter rationem, h. e. inutiliter & noxie supervenire dicitur. Mortem haud procul abesse docent spuma ante os, lingua valde tumida, purpurea, nigrescens,

C

anxie-

anxietas summa præcordiorum & angustia, extremorum frigus, pulsusque durus convulsivus & intermittens. Eadem metuenda sunt, si dolor præter evidentem rationem evanescat. Coac. Hæc enim omnia vel citam strangulationem vel Gangrænam præfagiunt. Omnis quoque symptomatice Angina mali admodum ominis est, quæ variolis, morbillis, vel Dysentericæ suppressæ per ineptam medelam, superaccedit. E contrario bonum eventum prænunciant, si tumor & rubor ad pectus superveniat; foras enim vertitur morbus. Aphor. 49. Sect. VII. In genere quo à Laryngis propriis & Pharyngis mediâ sede, remotiores muscoli afficiuntur, quo Febris moderatior, & functiones non magno in gradu impeditæ, eo benignius præsagium. Cum vero signorum pravorum & bonorum medius aliquis status est, neque proxima perniciës adstat, neque morbus discutitur, tunc fiunt suppurationes, quæ si in superiori Isthmi faucium loco sunt, neque admodum magni fuerunt tumores inflammatorii, sine periculo, rupto abscessu, hominem liberant. Si vero in imis faucium sedibus hærent, inflammatio fuit magna, vel ex viarum angustatione, vel ex magna copia puris asperam arteriam inundantis, cum rumpitur abscessus, periculo non destituuntur.

### §. XIII.

Curatio hujus morbi, pro diversitate partium affectarum, pro impetus febrilis ratione, vehementiæque symptomatum, ita adornanda erit, ut quantocyus, pristinæ fluiditati restituatur materia vasis impacta, atque sic suppuratio, Gangræna, vel & Scirrhus, quæ aut lethiferum aut dubium, aut in longum tempus protrahendum, molestumque eventum habent, præcaveantur, aut ita tractentur, ut  
nulla



nulla insignis læsio in his organis relinquatur. Primò igitur Indicationes curatoriaë, quæ causam proximam inflammationis & Febris respiciunt, ante omnia exposcunt, ut impetus inflammatorius ad partem affectam imminuatur, stasis ipsa sanguinis discutiatur, & Febris ad quandam mediocritatem redigatur. Secundò, ut symptomatibus illis gravissimis, quæ aëris & alimentorum vias obstruendo, ægrum in summum periculum conjiciunt, occurratur.

#### §. XIV.

Si ergo signa docent musculos Laryngis proprios præ aliis inflammatione laborare ( de asperæ enim arteriæ sola inflammatione ambiguitates quasdam superesse supra dictum est ) tunc ante omnia largissime sanguis detrahendus est, qui quidem communiter ex brachio, nec male educi solet; sed tamen cum observationes doceant, eum ex brachio extractum copiose, applicatis & exhibitis quoque aptis remediis, nihilominus progressum mali haud potuisse impedire, hinc recte cum Alexandro Tralliano, qui primus hujus auxilii mentionem facit, σφαγίτιδας, h. e. jugulares venas externas incidendas esse suaferim, inprimis cum eam post Trallianum haud pauci Medici cum summo successu institutam esse ostendant, quorum testimonia colligere superfluum esset, neque crediderim quenquam lecto Trallesii tractatu de vena jugulari frequentius secanda, necessitatem & utilitatem hujus V. S. in dubium vocaturum, aut eam periculosam esse asserere ausurum. Est vero illa ad imminens usque animi deliquium procuranda, id quod adstans Medicus ex pulsu vacillare incipiente, haud ægre deprehendere poterit.

#### §. XV.

Quo facto eodem die ad revellentia, deorsum evacuan-  
C 2
tia

tia medicamina est properandum, nec enim tempus aliquod prætermittendum, quo morbi ferocia frangi possit. Sic profecto Trallianus jubet, ut purgatio alvina non in crastinum diem differatur: „ Memini, inquit, me necessitate „ urgente, cum mane venam secassem, post meridiem ra- „ ninas aperuisse, vesperi vero cum succo Ptisanæ Diagry- „ dium propinasse, & sic ægre consecutus sum, ut stran- „ gulationem ex inflammatione solverem. “ Hæc vero lo- cum habent, cum æger in ætatis flore est, & tam vehemen- ter sævit malum, ut nullam patiatur procrastinationem. Purgantia vero acriora, uti Elaterium, Scammoneum, & Tithymali recens succus, qualibus veteres Medici, destituti moderatioribus, quæ recentioribus temporibus inventa sunt, utebantur, adhibere neque necessarium neque tutum est. Confugiemus ergo potius ad mitiora Antiphlogistica pur- gantia, uti sunt, Manna cum Nitro, Tamar-Indis & Sero lactis. Neque video quomodo Boerhaavius (in Comment. Cl. van Swieten p. 675.) rejectis acrioribus veterum pur- gantibus Elaterio & Tithymali succo, tutioremque usum talium commendans, quæ sine aucto motu valide tamen evacuant, Scammonei XVIII. grana cum unc. & dimidia Syrupi de Senna, commendare possit. Non ignoro equi- dem, ipsum existimare Scammoneum cum magnam copiam feri educat, sanguinem in serum resolvere, globulos rubros in minores serofos dividendo; sed an Euphorbium forma Errhini naso attractum, & serum instar rivulorum ex nari- bus & oculis eliciens, ideo ob resolutionem Sphæricularum sanguinearum in serofas, id efficit? an potius insigniter va- sa excretoria stimulando hæc agunt? ibique magis conve- niunt, ubi irritatio major & abundantis humidieductio re- quiritur? at vero in morbis inflammatoriis humidi diluentis

potius



potius defectus, quam abundantia est. Longe certe ea purgantia Antiphlogistica præferrem, quæ in capite de inflammatione in universum ab eo indicantur, uti sunt Rheum cum Sale polychresto, Chrystalli Tartari, Agaricus cum Nitro, Tamar-Indis & foliis Sennæ &c. Hisce vero Medicamentis, quædam Diarrhœa artificialis excitatur, quorum usui remedia resolventia & refrigerantia interponenda sunt. Præterea usum sectionis raninarum, quam commendat Sydenhamus, & ante ipsum plures alii, quanquam quidam non semper satis eam tutam esse, notaverint, non rejicerem, neque admotionem hirudinum, vel scarificationem Menti. Sed videtur tamen, quòd si non adeo vulgo Jugularium sectio negligeretur, vel potius metueretur, non tanto apparatu illarum particularium sanguinis detractionum, nos opus habituros.

#### §. XVI.

Ad Febrem moderandam & promovendam resolutionem, medicamenta nitrosa subacida saponacea, ex Oxymelle, Syrup. Granat. acidor. dulc. Nitro, lap. 69. Aceto solutis copiose sunt propinanda; in Laryngis enim inflammatione, deglutitio satis adhucdum procedit. Cumque Angina epidemica, maligna est, aut variolis & morbillis se adjungit, Emulsio tunc camphorata Celeberr. Werlhofii, locum habet, ex feminibus Melonum cum aquæ libr. 1. tritis, Nitri drachm. 11. Camphoræ drachm. 1. vel mitius ex Sem. Melon. & Card. Mar. ana. unc. β. Camphoræ scrup. 2. decocti Hordei vel aquæ font. aut cujusdam destillatæ libr. 1. addendo Antim. Diaphor. & Nitri ana. drach. 1. Saccharoque adjecto ad gratiam. vid. Commerc. Phys. Med. Norib. ann. 1734. p. 258. 268. & 269. Camphoræ vero usum in morbis acutis aliunde probatum esse suppono, neque hîc

hisce immorari licet. Gargarismata quæ in Anginâ curanda adeo laudantur, in hoc casu locum ipsum affectum multum juvare nequeunt; danda sunt potius lenia collutoria oris, ad siccitatem ejus, ut & Isthmi faucium tollendam: uti sunt decoctum Glycirrhizæ cum mucilagine seminis Cydoniorum, adjecto Nitro, &c. inprimis vero vapor aceti cum magna copia aquæ diluti, ne tussim moveat, ad Laryngem ipsum se penetrabit, vimque suam tam repellentem leniter & resolventem, quam & ardori oppositam exercebit. Externe in hoc casu Coelius Aurelianus optime commendat, lanam tepido oleo madidam, toti collo ad aures usque imponendam, ut partes externæ relaxentur, & dolentes demulceantur.

§. XVII.

Si vero Laryngis inflammatio immaniter incre scat, ita ut metus strangulationis maximus sit, non diu est cunctandum, sed antequam vel Gangræna vel suffocatio fiat, ad ipsam Bronchotomen, perperam vulgo dictam Laryngotomiam, est accedendum. Quæ quali ratione administranda sit vid. in Heisteri Chirurg. neque audiendus est Coelius Aurelianus, qui eam ut periculosa[m] rejicit, atque tussim suffocantem eam sequi dicit. Hoc enim symptoma tum demum oritur, si sanguis ex vulnere in asperam arteriam illabatur, vel tubus immissus oppositum parietem asperæ arteriæ attingat, eamque irriter. Notari hîc meretur mirabile sensationis genus asperæ arteriæ, quæ cultro secta nullam excitat tussim, dum aquæ guttula vel sanguinis in eam incidens, eam acerrimam movet. Cum jam debita Encheiresi aër asperam arteriam, per cannulam ei insertam ingreditur & egreditur, interea causæ inflammationis & summæ illius angustationis dissipari possunt. Quod factum esse cognoscitur, si digito obturata cannula, æger aërem per os attrahere & in pulmones demit-



demittere queat. Postea vulnus remota cannula aëri vèha percurandum est ; in cuius sanatione hanc cautelam observandam esse præcipit Boerhaavius. *Commentar. dicto p. 691.* ne vel annuli asperæ arteriæ vel interstitium membranaceum annulorum, si hoc solum dissectum fuit , una cum ipsa cute colli, futura adstringantur. Sic enim fieri posse notat, ut aëre per rimulam asperæ arteriæ non satis clausam, sub cute in ejus cellularem tunicam irrepente , & per vicinam cutem se diffundente Emphysema nascatur ; additque se non meminisse eos, qui de Bronchotome scripserunt , Emphysematis post hanc operationem Chirurgicam secuti , mentionem fecisse. Hoc utcunque se habeat , non possum, quin hîc notem celebri illi Argentoratensium Chirurgo Domino Le Maire , Emphysema ab hac causa factum haud ignotum fuisse , quod rara quædam observatio, quæ in ejus Msto. de operationibus Chirurgicis legitur , probat : monet nempe ibi , vulnus trachæ arteriæ prius claudendum , deinde vulnus cutis sanandum esse , distinendo interim labia vulneris cutanei , cum linteis carptis ; si enim aliter procederetur , & cutis vulnus & asperæ arteriæ , una futura constrictum , simul ad sanationem quis perducere conaretur , tunc quoniam cutis citius sanescit & occluditur , quam aspera arteria, aër facile in cutem se subducere posset, & dictum morbum producere , inque hanc rem sequentem historiam affert. Miles vulnus in aspera arteria gladio accepit punctim , parva facta apertura , Chirurgus quidam vocatus , cutem acu confuit ; at vero aër per vulnus asperæ arteriæ in cellulas cutis ingrediens, tam vehementer eam totam distendit , ut post 6. mensium spatium , instar tabidi emaciatus , fatis cederet. aperto cadavere, ubique sub cute purulenta materia inveniebatur , quæ ab infinitis parvulis abscessibus colligebatur , à compressione & dilaceratione vasculorum cutaneorum originem trahentibus.



§. XVIII.

Cum vero Pharynx inflammatur, ipsa deglutitio variis gradibus impeditur, vel & impossibilis redditur, pro inflammationis magnitudine & sedis affectæ diversitate. Si enim ejus superior pars circa linguæ radicem laborat, uti sunt Pharyngo-Glossa-Staphylini Valsalvæ, Genio, Mylo, Cephalo-Glossa-Pharyngei, vel inferior pars, in qua sunt Hyo-Thyreo, Crico-Pharyngei, afficitur, curatio non differt, ratione indicationum generalium. Sed quoniam Febris ut plurimum mitior est, & respiratio non magnopere intercepta, hinc V. S. & purgantium moderatio usui esse debet, tanto magis autem Gargarismatibus hic locus est, atque Clysteribus; illa jam ab antiquis temporibus, pro ratione initii vel incrementi ipsius morbi, vel repellentia magis vel resolventia parabantur; hinc recte monet Cl. Junckerus in conspectu Medic. Theor. Pract. duas Species Gargarismatum simul in promptu habendas esse, unam ex adstringentibus, alteram ex resolventibus, ut ab initio adstringens adhibeatur, procedente vero morbo, adstringens cum resolvente misceatur, donec resolvens potiores habeat partes, vel & solum usu veniat. Prior species ipso suadente ex Rad. Bistortæ, Tormentill. Herba Brunellæ, Pyrolæ, Gallis, & si Fortius adstringere opus est, quadam parte aluminis constare potest, cui Roob Dianucum, à Galeno inventum, & ab eo tantopere laudatum, adderem. Posterior vero, ex Rad. Irid. Florent. Helenii, Caryophyllatæ, Althææ, Herbis Salv. Bellid. min. Hyssopi, Florib. Chamæmeli, Caricis Puing. Roob Diamoron, Albo Græco & Nitro Chrysell. conficienda. Suntque hæc Gargarismata haud magno impetu ex Syphone injicienda, quia sic locus inflammatus vehementius tensus & compressus, molestias augere necessario debet, sed lenius hæc admovenda, neque penitus supino capite, sed ad anteriora leniter reclinato, ne aliquid in asperam arteriam delabatur. Inter externa collo imponenda, maximopere laudatur Emplastrum de Meliloto cum Diachylo simplici mixtum, cui & Camphoræ aliquid adjici potest. Vel & Cataplasmata emollientia, ad materiam extrorsum evocandam, usui sunt, quæ tunc imprimis necessaria sunt, cum muscoli ossis Hyoidis, vel communes Laryngis, Hyo-Sterno-Thyreoidei, inflammantur.

§. XIX.

Si vitium in Velo Pendulo Palatino, Tonsillisque inhærescit, mitior neque periculosus morbus, vix tantam Febrem junctam habet, quæ acutæ nomen mereatur, cæteris tamen paribus haud absimilia remedia admittit. Recusante tandem morbo omnem spem resolutionis inque suppurationem abeunte, emollientibus remediis ea est acceleranda; decocta ergo talia ore continenda, & exterius forma cataplasmatum toti collo sunt circumdanda, donec vel sponte rumpatur, vel si ad locum abscessus perveniri possit, instrumentis Chirurgicis artifice manu aperiatur, ulcusque aquosis & mellitis mundetur; de qua re ut & de exitu in Scirrhum plura afferre supersedeo. Victus in genere sit vehementiæ Febris accommodatus, & sicubi deglutitio impossibilis, Clysteres ex aqua & lacte aliquoties per diem injecti, vel ex jusculis carniū, si Febris non nimis acuta sit, necessarii sunt. At paginarum angustia me hic subsistere cogit.

F I N I S.